

《佛說解憂經》 CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 17, No. 804

No. 804

佛說解憂經

西天譯經三藏朝散大夫鴻臚卿傳教大師臣法天奉 詔譯

稽首歸依正等覺	能度無邊大苦海
恒以甘露潤群生	令得涅槃我頂禮
稽首歸依正法藏	能止無邊苦惱因
顯示過失利眾生	令獲寂靜我頂禮
稽首歸依大苾芻	能與世間為福聚
發行勤修安樂因	善斷輪迴我頂禮
愛別離最苦	憂火鎮燒然
若欲自安心	端居作觀想
譬如群鳥獸	暫聚各分飛
生死人亦然	云何懷憂苦
只自一有死	眾人皆長生
別離痛不任	親姻須啼泣
三界大輪迴	無有免斯者
平等受無常	云何懷憂苦
若人生貪愛	孰知貪火燒
如彼犛牛身	愛尾遭人殺
世人多迷醉	欲逃嶮惡道
設盡方便心	不能免離苦
如彼野麋鹿	常被師子逐
究竟不能逃	云何懷憂苦
大地及天上	三界與四生
未曾得見聞	不受無常者
亦如山野火	焚燒草木時
不擇花果林	俱時成灰燼
愚癡諸眾生	顛倒生妄想
身繫無常繩	無人能可解
色界梵世中	禪味為安樂

亦如樹臨河 不久風水壞
百億轉輪王 千萬天帝釋
念念即無常 如風吹燈焰
過去大神仙 五通心自在
往復騰空行 猶被無常取
金剛堅固身 尚自示寂滅
凡識如芭蕉 云何欲久住
大地妙高山 及以四大海
劫壞亦歸空 何況眾生趣
龍居深海裏 眷屬常圍繞
金翅鳥能食 別離苦亦爾
或人往他界 欲避於無常
如入磨竭魚 口中求安隱
如是欲色界 及彼非非想
未有於一物 不被無常吞
唯有正等覺 是真依仗處
信受汝諦聽 能解諸憂惱

如是我聞。一時佛在舍衛國祇樹給孤獨園。爾時世尊告苾芻言。眾生無數。輪迴無邊。如蟻循環。無有窮盡。眾生貪愛無明障閉。如陷泥中。而不能出。過去有情。輪迴往復。數不能知。苾芻。所有大地之土。都聚一處。和為泥丸。大小如豆數彼眾生。無始劫來所生父母子孫。每一人下一泥丸如是泥丸下盡。父母子孫數不能盡。苾芻。如是無邊輪迴眾生。貪愛無明。顛倒陷愛欲泥中。生死輪迴。不知其數。是知令汝學斷輪迴。佛言。苾芻。如是補特伽羅。輪迴眾生。以骨作聚。如妙高山。不壞不爛。如是無學聲聞。證四聖諦。了知此苦真實為苦。苦滅證苦聖諦。彼補特伽羅。見此屍骨不知是苦。亦不能滅三界煩惱。若滅三界煩惱。證須陀洹不空法。決定得菩提。由於七生天人之中。作斷輪迴。除滅煩惱。七生滿已。聖諦現前。正見智慧。滅盡餘惑。到涅槃寂靜。彼補特伽羅。方得解脫輪迴之苦

佛言。苾芻。如人眷屬。互相愛樂。以貪愛故。廣造諸業。生死輪迴。譬如野象陷泥坑中。無有出期。又彼眷屬。如恒河沙。父母養育。皆如親子。至後世中。隨其報應。各各不同。或為僕從。或為冤家。互相瞋恨。欺辱打罵。或為傍類。互相食噉。或被殺害。如是種種。諸趣輪迴。如七仙眾。或聚或散。亦如天雨生其水漚。或生或滅。如是眾生。愚癡大力。迷惑顛倒。不了輪迴。於其眷屬。妄生樂想。造種種業。未有須臾得清淨住。又彼有情。無始輪迴。入地獄中。所飲銅汁。過大海水。如彼猪狗。食不淨物如妙高山。又彼有情。生死別離。愛戀泣淚。亦如海水。又彼有情。更相殺害。積聚彼頭。過梵天界。虫食膿血。亦如海水。又餓鬼趣。以宿慳貪。受飢

渴苦。如遇飲食即成煙焰。鬼報滿已。設生人中。貧窮飢困。種種苦惱。說不能盡。又彼有情。以修福善。生忉利天等境界殊勝。恒受快樂。貪愛熾盛。如火燒乾草。報壽盡時。即墮惡趣。譬如飛禽折其兩翼。剎那落地受種種苦。是故汝等。學斷輪迴。速求解脫

佛言。苾芻。譬如江河大地日月星辰須彌盧山及諸聚落世界。未壞而得久住。常在世間。今此經典。亦復如是。世界未壞。法亦久住。於意云何。為與一切有情止息輪迴故。苾芻聞已。信受奉行